


TEZAUUR LITURGIC

31 IULIE

**ACATISTUL
SF. MUCENIC
IURIE NOVIȚKI
DE LA
ST. PETERSBURG**



MOSCOVA, 2000



Акафист святому петроградскому новомученику Юрию Новицкому, профессору Санкт- Петербургского университета

Кондак 1

Избранный Предвечным Богом и возлюбивый
Его всем сердцем, страдания и смерть за Него
претерпевый и душу свою Ему вручивый, и от
Него же венцем нетленным и даром
чудотворения увенчанный, всехвальный и
богоносный страстотерпче, благоверный
болярине Юрие, многих ко Христу обративый,
обрати и наша сердца ко Господу Иисусу, и , яко
имеяй дерзновение велие ко Всесвятей и
Единосущней Троице, молися непрестанно о
спасении нас, грешных, и от всяких бед
свобождай ны, зовущия ти:
Радуйся, святой новомучениче Юрие
Петроградский, светом правды Христовой вся
путие жития нашего озаряющий!

Икос 1

Ангелов и человеков Творец посла тя, святче
Божий, Церкви Российстей во укрепление,

жаждущим же ведения истины во благое
вразумление и назидательное окормление, яко
просвети тя благодатию своею, ограждая от
влияния лжепророков рая земного, ты бо токмо
за ны Распятому и Воскресением жало смерти
поправшему, Христу, Пути, Истине и Жизни
неизменно до кончины мученической твоя
следовал еси; ныне же веру соблюдши, яко
верный воин Христов, радуешься в Небесном
Отечестве, и молишься усердно за нас, с
надеждою благою и любовью горячею
воспевающих ти сице:

Радуйся, душу твою за веру спасительную
положить не отрекись;

Радуйся, прещений безбожных и богоборных
власти не убоявшись;

Радуйся, мучений за исповедание истинного
Бога не утрашившись;

Радуйся, в невечернем дни Царствия Божия
ныне почивающий;

Радуйся, трисвятую песнь херувимски со Ангелы
и всеми святыми воспевающий;

Радуйся, всех с верою приходящих к тебе
благодатно освящающий;

Радуйся, усердно призывающим желания
сердечныя исполняющий;

Радуйся, возлагающим упование на тя росту
духовному пособствующий;

Радуйся, святой новомучениче Юрие
Петроградский, светом правды Христовой вся
путие жития нашего озаряющий!

Кондак 2

Видя Господь благое сердца твоего изволение,
прехвальный Юрие, яко издетска послужити
Ему восхоте, призва тя на тесный и
прискорбный путь жития благочестиваго и
подвиг богоугодный, иже подъял еси снискания
вечной истины Господней и проповедания
правды Христовой. Ты же всем сердцем, всею
душею и всею крепостию твоею Иисуса
Сладчайшего возлюбивши непрестанно зывал
еси: Аллилуиа.

Икос 2

Разум озаренный благодатию Божиею измлада
имел еси, преславне Юрие, от юности бо
сродником твоим богомудрым болярином
Орестом наставляемый, хранил еси в сердце
твоём закон Христов, чтение Божественных
писаний, наипаче же душеполезных
повествований о житии угодников Божиих и
людей именитых и благочестивых, зело возлюбил
еси; преподаваемая же тебе о мире Божиим
учения, силою действовавшая в тебе благодати,
в духовный сот превращал еси, добрая точию

держал еси. Мы же ныне таковую мудрость твою хваляще, взываем ти:

Радуйся, от юности твоея всем сердцем твоим Христа возлюбивый;

Радуйся, и сам от Него возлюблен и благословен бывый;

Радуйся, заповедей Иисусовых ревностный исполнителю;

Радуйся, добрый и усердный последователю Его святого учения;

Радуйся, сословия дворянского и чина шляхетского драгоценное украшение;

Радуйся, от Творца Всемудраго пребогато талантами многима одаренный;

Радуйся, сторицею я умноживый и има усердно людям послуживый;

Радуйся, всем житием твоим Предвечному Господу угодивый;

Радуйся, святой новомучениче Юрие

Петроградский, светом правды Христовой вся путие жития нашего озаряющий!

Кондак 3

Силою и благодатию Духа Святого движимый, хранимый и озаряемый, прехвальный болярине Юрие, в духе Евангельских заповедей воспитав свою душу, от юности явился еси делателем неленостным на ниве Христовой, все упование

на Единого Бога возложив, сего ради преуспел еси во учении и наставничестве, милосердии и молитве, веры ради гонения претерпев даже до смерти, и ныне чистою душею в райския обители вселився, идеже молишися о всех о тебе Господеви вопиющих: Аллилуйя!

Икос 3

Имуще тя предстателя добра ко Всещедрому Богу, всехвальный новомучениче Юрие, нас напастьми и обстояниями скорбными одержимых укрепи, подавая руку спасения, страстей бурю утиши, к безстрастия пристанищу управи и от злых устен защиты твоих молитв покровом, и милости от Всемилосердного Бога испроси нам, с верою, любовью и надеждою величающих тя сице:
Радуйся, духовного просвещения светильниче небосветлый:

Радуйся, милосердия и милостыни источниче неисчерпаемый;

Радуйся, светильниче, правы стези ко спасению освещай;

Радуйся, от потопления бурями житейскими спасаай;

Радуйся, унывающих и мятущихся укрепляй;

Радуйся, от заблуждения и сомнения отриваяй;

Радуйся, враг видимых и невидимых от нас

отгоняющий;
Радуйся, благодатный щите, от бед ны
сохраняющий;
Радуйся, святой новомучениче Юрие
Петроградский, светом правды Христовой вся
путие жития нашего озаряющий!

Кондак 4

Бурю многомятежную житейского моря
безбедно прошел еси, благоверный болярине
Юрие, и гавани спасения вечного и жительства
с Богом безконечного достиг еси, окормляемъ
бо бе заповедьми Христовыма, яже быша
свотильник ногам твоим, и свет стезям твоим.
Темже ныне в горних обителях водворяешися, и
купно со всеми новомученики и исповедники
российскими радостно поеши Триединому Богу:
Аллилуиа!

Икос 4

Слышавше, благоверный болярине Юрие, об
отречении благоверного императора Николая и
падении империи россиястей, не возроптал еси,
но разумея, яко вси путие народов и царств в
деснице Всемудраго Бога выну пребывают, в
годину тяжкую смут и невзгод На Него Единого
упование твое возложи. Темже и мы, уповая на
твое предстательство, молимся: буди нам

скорый помощник и покровитель в земном житии нашем, да благодарно вопием ти:
Радуйся, душу свою добродетельми просветивший.

Радуйся, сердце твое Христу отверсто имевый;
Радуйся, яко промышляеши о нашем спасении;
Радуйся, яко ты печешися о добродетельном нашем совершении;

Радуйся, Сладчайшего Иисуса более земных благ и пристрастий чтити научаяй;

Радуйся, доверием и любовью к Нему души наша преображаяй;

Радуйся, каменем краеугольным жития нашего Его полагати сподвигаяй;

Радуйся, в Нем токмо отраду, утешение и возрастание духовное обрести наставляй;

Радуйся, святой новомучениче Юрие

Петроградский, светом правды Христовой вся путие жития нашего озаряющий!

Кондак 5

Боготечней звезде, путь верным ко Отцу Небесному указующей, воистину подобен явился еси, всехвальный новомучениче Юрие, яко ты во вся дни земнаго жития твоего учеником, студентом, друзьям и врагом являл еси образ жития добродетельнаго и богоугоднаго, озарял еси всех окрест тебе сущих светом истины

Христовой и ныне, нас, воспоминающих подвизи
твоя подвигаеши радостно воспевати
Сладчайшему Иисусу, выну тя своею благодатно
укреплявшему, ангельское пение: Аллилуйя!

Икос 5

Видевшее в тебе источник мудрости великия и
познания глубокаго многия людие прихождаху к
тебе во всеучилище именитое, иже во граде
Петрове, и поучахуся от тебе знаниями
полезныма, ты же студентом твоим был еси
наставник благий; такожде в написании книг и
постижении истины научныя усердно
потрудился еси, прехвальный Юрие. Сего ради
верно молим тя: предстательством твоим ко
Господу, источнику святости и премудрости,
глубокую тьму греха отжени, невежественных к
познанию Истины настави, шатания умов
низложи, нас же во правде Божией укрепи и
прими милостиво возносимыя ти похвалы сия:
Радуйся, от Источника Премудрости мудрости
наученный.

Радуйся, делатель Христова винограда явивыйся
избранный.

Радуйся, правоведов и адвокатов похвало и
благословение;

Радуйся, всех истины взыскующих благодатное
озарение;

Радуйся, мужей ученых и студентов к познанию Христа приведение;
Радуйся, очи наши сердечныя благодатию и мудростию просвещающий;
Радуйся, заблудшим и ослепленным путь правый показуший;
Радуйся, прельщения и сомнений в действии и милосердии Божиим ны удаляющий;
Радуйся, святой новомучениче Юрие Петроградский, светом правды Христовой вся путие жития нашего озаряющий!

Кондак 6

Проповедниче и ревнителю любви деятельныя и самоотречения ближнего ради в годину смут и нестроений воистину явился еси, благоверный боярине Юрие, егда многим страждущим вспоможение оказал еси, радея не токмо о насыщении их благами земными, обаче же об обращении и возвращении их ко Иисусу Христу, Источнику и смыслу бытия человеческого, сего ради молитвы горячия возносил еси. Мы же ныне просим тя: сподоби и ны в сокровенных храмах сердец воздвигнути духовныя престолы Спасителю, муки и смерть за ны претепевшему, и да сподобимся с тобою купно Милоседному Господу во веки воспевати: Аллилуйя!

Икос 6

Возсиял еси, блаженне, добротою души твоея к людем, святой Юрие, сугубое попечение о чадах больных и страждущих являя, и иных христиан к сему же воздвигая и тако дивными бо дела добрыми твоими и труды многими прославил еси Отца, Иже есть на небесех, образ благодати и милосердия неизреченнаго Того людем являя. Ныне же в небесных селениях славы водворяясь, не забуди нас, любовью тебе зовущих:

Радуйся, огнем любви к Спасителю и ближним в сердце своем горевый;

Радуйся, токмо Ему Единому выну служить ны сподвигающий;

Радуйся, отроков и юношей ко Иисусу и церкви Его преславно приводящий;

Радуйся, в час недоумения мысль благу на сердце нам полагаяй;

Радуйся, и нас служить ближним нелемерне и усердне научаяй;

Радуйся, суету помышлений сердечных наших огнем молитв твоих развеваяй;

Радуйся, в верности и в стокойсти в Евангелии нас всех утверждаяй;

Радуйся, не удалятися от источника животворных благодати наставляяй;

Радуйся, святой новомучениче Юрие

Петроградский, светом правды Христовой вся
путие жития нашего озаряющий!

Кондак 7

Хотяще познати совершенне Христа —
Ипостасную Премудрость и Силу, по
благословению святителя Вениамина,
святоотеческаго наследия взыскал еси, и орлу
уподобился еси, к высоте небесней молитвенно
возлетевше, постигал еси Богословскую
премудрость в свете истиннаго благочестия,
просветил еси ближних твоих и ученик
избранных в училище богословском. Сего ради
просим тя, святой Юрие, и наши умы и
теплохладием пораженныя сердца наша озари
светом Христовым, да возможем купно с тобою
в блаженной вечности Спасителю воспевати:
Аллилуйя!

Икос 7

Новое служение и новыя испытания подъял еси,
всехвальный Юрие, егда злочестивыя
большевики гонения на Церковь Святую и
святыни ея возвигоша, ты же купно со
святителем петроградским Вениамином восстал
еси на борьбу за дело Христово и правды ради
Божия волею пострадал еси, яко претерпел еси
от власти богоборческаго чести гражданския

лишение, заточение в темнице и судилище несправедное. Сице молим тя: сподоби и нас верными быти Христу даже до смерти, да жительствуем по словеси Евангельскому: "Не бойтесь от убивающих тело, души же не могущих убить". Укрепи же и нас, зовущих ти таковая:

Радуйся, тя бо ни скорбь, ни теснота, ни глад не устрашиша;

Радуйся, яко сия вся от любви Христовы ты не отлучиша,

Радуйся, ветве лозы Христовы, сторичный плод принесшая;

Радуйся, очи наши духовныя к зрению Бога изошряющий;

Радуйся, нас, алчущих и жаждущих правды, насыщающий;

Радуйся, сердца наша благодатию Божиею, ти данною, очищающий;

Радуйся, к терпению бед, лишений и скорбей нас воодушевляющий;

Радуйся, в пренесении испытаний и гонений нас укрепляющий;

Радуйся, святой новомучениче Юрие

Петроградский, светом правды Христовой вся путие жития нашего озаряющий!

Кондак 8

Страно есть маловерным и малодушным зрети, како ты, премудрый Юрие, воистину крепкий воин Христов, судилищем неправедным обвиненный, все упование ваше на Господа возложи, почитающе смерть яко стражем Господним следование, возблагодари Его, сподобившаго тя чашу Его пити. Сия убо ныне поминающее, величаем верность твою Господеви и велию веру твою, адаманту подобную, ибо веровал еси, яко за Христа и со Христом пострадавший, воскреснут с Ним для жизни вечныя, идеже со ангелы вознесут Ему пение: Аллилуйя!

Икос 8

Вся убо могий о укрепляющем тя Христе, болезни и немощи смиренно претерпевая, на Бога все упование возложил еси, мирскаго пристрастия гнушаяся, безбожников прещения не устранив, блаженне Юрие, и гонения от властей предержащих претерпевая, будущия радости провидел еси восприятие, Страдания за истину подъяв, страстотерпче Христов, теми душу свою очистил еси, ныне же Спасителя умоли, да в доброделании нас укрепит, грехов очищение подаст, к единению с Ним в вечности блаженней ны предуготовит, и твоего

предстательства ради благословит всех нас,
взывающих ти сице:
Радуйся, козней безбожных власти не
убоявшийся;
Радуйся, Истину Божию паче славы земныя
возлюбивый;
Радуйся, яко во мраке безбожия правую веру
утверждавый;
Радуйся, пощады от безбожных судий не
просивый;
Радуйся, гонения и поругания Христа ради
стойко претерпевый;
Радуйся, яко велию благодать от Господа стяжал
еси;
Радуйся, ненавидящих тя от всего сердца
прощал еси;
Радуйся, образ Божий в своем сердце неизменно
носил еси;
Радуйся, святой новомучениче Юрие
Петроградский, светом правды Христовой вся
путие жития нашего озаряющий!

Кондак 9

Вси видящи тя в темничнем заточении,
новомучениче преславный Юрие, зело дивляхуся
твоему непоколебимому стоянию за веру
истинную и святую, заветы бо отеческия
соблюдая, не токмо не устранился еси уз,

оплеваний и поруганий, но мужественно вся сия терпя за Христа, слезного исполнился умиления, благодарственно воспевал еси Богу: Аллилуиа!

Икос 9

Ветия многовещанныя не возмогут по достоянию воспети страдания твоя за Христа Распятого, прехвальне новомучениче Юрие. Ты бо николиже возроптах, поминающе глаголы Господни: «Блажени есте, егда поносят вам, и ижденут, и рекут всяк зол глагол, на вы лжуще Мене ради, радуйтесь и веселитесь, яко мзда ваша многа на небесех». Мы же, сии глаголы почитающе, евангельское славословие тебе, угодниче Христов, со умилением и надеждою возносим:

Радуйся, яко звезда, во мраце безбожия светло возсиявый;

Радуйся, страдания за Христа и церковь Его радостно претерпевый;

Радуйся, житием твоим Солнце Правды, Христа проповедавый;

Радуйся, милостию и нищелюбием милость велию от Господа стяжавый;

Радуйся, кротостию и смирением землю обетования унаследовавый;

Радуйся, изгнанный правды ради и в Небесныя

обители со славою приятый;
Радуйся, нищетою духовною сокровище
Царствия Божия обретый;
Радуйся, плачем и скорбьми временными
утешения вечного сподобивыйся;
Радуйся, правды на земли алкавший, на Небесах
же Правдою Божиею насыщенный;
Радуйся, святой новомучениче Юрие
Петроградский, светом правды Христовой вся
путие жития нашего озаряющий!

Кондак 10

Спасти хотя душу свою, вся земная и временная
во уметы вменил еси, святой и богомудрый
Юрие, неуклонно крестным путем Спасителеви
последствовал еси, муки душевныя, страдания
разнообразныя, осмеяния и заушения,
унижения и биения купно со святителем
Вениамином, преподобномучеником Сергием и
страстотерпцем Иоанном претерпел еси, с ними
же купно от богоборец чашу смертную испил
еси. В небесныя чертози Ангелы Божии
вознесоша чистую душу твою, идеже со
святители и исповедники Престолу Всевышняго
предстоиши, непрестанно взывая укрепльшему
тя на подвиги велии: Аллилуйя!

Икос 10

Царя Небеснаго Христа верный последователь
был еси, благоверне Юрие, темже по неложному
Его глаголу: «Идеже есмь Аз, ту и слуга мой
будет», мы чтущии тя, веруем несомненно, яко
ты со Христом в обителях блаженства вечнаго
водворяешься, и радости нетленные
наслаждаешься, яко истинный Того угодник.
Сего ради величаем тя сице:

Радуйся, блаженство вечное унаследовавый;
Радуйся, некрадомое богатство обретый;
Радуйся, страны наша светлое радование;
Радуйся, в скорбех и заботах прибежище наше и
упование;
Радуйся, болезней и страстей греховных
пречудное исцеление;
Радуйся, в судебных испытаниях благодатное
вспоможение;
Радуйся, узников и всех печалиями томимых
отрадное посещение;
Радуйся, в бедах, тяжких работах, изгнании и
лишениях сущим утешение;
Радуйся, святой новомучениче Юрие
Петроградский, светом правды Христовой вся
путие жития нашего озаряющий!

Кондак 11

Пение похвальное возносим тебе, святой наш
заступниче и многомилостивый покровителю, ты

бо верность и твердость в терпении проявил еси, да сам, искушен быв, сможешь искушаемым нам помощи, да и мы принесем Христу плод веры в добродетели, в добродетели же разум, в разуме же воздержание, в воздержании же терпение, в терпении же благочестие, во благочестии же братолюбие, в братолюбии же любовь, и воспоем Ему с тобою купно ангельское пение: Аллилуйя!

Икос 11

Светозарного светильника, елея молитвы чистыя преисполнена, и пламенем веры светло сияюща, воздвиже тя Господь, новомучениче Юрие. Мы же, очесы веры нашея зрим убо тя в Троическом Свете пребывающего и Отечеству нашему и всему роду христианскому мира и благоденствия просящего, с упованием веры, просим тя, заступниче наш святой: предстательством твоим облагодати вси верныя, чтущия святую память твою и песненно тя ублажающия, и сице тебе воспевающая:

Радуйся, радостный жителю Горняго Иерусалима;

Радуйся, яко на главе твоей сияет царская диадима.

Радуйся, за любовь свою Царство вечныя любви стяжавый;

Радуйся, молитися Богу за ны дерзновение
приявый.

Радуйся, сладчайший лик Христов выну зриши;
Радуйся, Царицу всех цариц со святыми присно
прославляеши;

Радуйся, ищущим Царствия Небеснаго
спасительнаго пути проповедниче;

Радуйся, недуг греховных и ран душевных врачу
благоискуснейший;

Радуйся, святой новомучениче Юрие
Петроградский, светом правды Христовой вся
путие жития нашего озаряющий!

Кондак 12

Благодатию Божиею обогативыйся, по
отшествии твоём от земных, святой
страстотерпче Юрие, наипаче к трисолнечному
престолу Троицы Пресвятыя приближивыйся, и
ныне пребываеши в непрестанной радости,
восходя от славы к славе, и воспеваеши со
ангелы Пресвятую Троицу, Ея же милосердие и к
нам приклони, с тобою купно сподобимся во
веки воспевати Всеблатому Господу, Подателю
благ земных и небесных: Аллилуйя!

Икос 12

Поюще песнь благодарения Всещедрому
Человеколюбцу Богу, прославльшему тя, яко

верного исповедника Церкви Русския, величаем
твоя подвиги добропобедные, почитаем
страдания, хвалим долготерпение, славим
непреоборимое стояние за веру Истинную,
ублажаем, новомучениче Юрие, и святую твою
кончину, торжествуем небесное увенчание твое
и к твоему предстательству за ны пред
Триипостасным Господом Нашим усердно
прибегаем и с надеждою приносим тебе, святой
наш заступниче, от благодарных сердец наших
похвалы сия:

Радуйся, яко тебе призывающим быстро
предваряеши;

Радуйся, яко любящих тя от различных бед и
напастей изымаеши;

Радуйся, яко неправых ковы разрушаеши;

Радуйся, яко правым путем следовати
научаеши;

Радуйся, распри и раздоры скоро искореняяй.

Радуйся, хлеб насущный, кров и работу обрести
помогаяй;

Радуйся, мрачныя облаки скорбей скоро и
благодатно разгоняяй;

Радуйся, Милосерднаго Бога хвалити и
благодарити ны научаяй;

Радуйся, святой новомучениче Юрие

Петроградский, светом правды Христовой вся
путие жития нашего озаряющий!

Кондак 13

О всеблажене угодниче Божий, добропобедный
страстотерпче Юрие, внемли усердным
молениям, к тебе ныне возносимым, призри на
вся наша нужды - душевныя и телесныя, помози
нам, странствующим в мори житейстем и далече
отстоящим от тя, возвышай наша мысли,
чувства, желания и намерения от земнаго к
небесному, да безпреткновенне прешедше
земный путь наш, взыдем во Иерусалим
Небесный, идеже представше пред лицом
Предвечнаго Господа Нашего, с тобою купно
воспоем Ему: Аллилуиа! Аллилуиа! Аллилуиа!



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО